


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-63	Al-Munafiqun	11	2	Madaniyyah	Ke-104	2



Zaman Diturunkan

Surah al-Munafiqun diturunkan setelah Rasulullah s.a.w. pulang daripada Ghazwah Bani al-Mushthaliq pada bulan Sya'baan tahun ke-6 Hijrah, ketika itu orang-orang munafiq sedang bercakap-cakap bahawa 'Abdullah bin Ubai (ketua orang-orang munafiq) berkata: "Orang yang lebih mulia dan lebih kuat (الأَعزُّ) akan mengeluarkan orang yang lebih hina dan lemah (الأَذَلُّ) dari Madinah. (Ayat: 8). 'Abdullah bin Ubai telah menganggap dirinya sendiri sebagai الأعزُّ dan Rasulullah s.a.w. pula dianggapnya sebagai (الأَذَلُّ)".

Kelebihan Surah Al-Munafiqun

Rasulullah s.a.w. selalu membaca Surah al-Jumu'ah dan Surah al-Munafiqun di dalam shalat Jumaat, tujuan Rasulullah s.a.w. berbuat begitu adalah supaya sampai kandungan kedua-dua surah itu kepada semua orang dan mereka tidak hanya menghafalnya, sebaliknya diharapkan akan beramal dengan segala hukum-hakam dan pedoman yang terdapat di dalamnya. Sahih Muslim, Kitab Jumu'ah, Bab Apa Yang Dibaca Dalam Shalat Jumaat, hadits 2,063.

Perkaitan Surah Al-Munafiqun Dengan Surah Sebelum Dan Selepasnya.

Di dalam Surah al-Jumu'ah sebelum ini telahpun dinyatakan bahawa untuk mengukuhkan negara Islam dan untuk membersihkan jiwa orang-orang yang beriman perlu sekali umat Islam berpegang teguh dengan al-Qur'an dan as-Sunnah, di samping menegakkan perpaduan masyarakat dengan melaksanakan shalat Jumaat dan khutbah Jumaat. Jika tidak umat ini juga akan menjadi seperti 'ulama'-'ulama' Yahudi yang belakangnya memikul kitab tetapi tidak mengamalkan ajaran dan apa yang terkandung di dalam kitab. Di dalam Surah al-Munafiqun ini pula dinyatakan bahawa untuk teguh negara Islam dan untuk umat ini berjaya dalam jihad, mereka hendaklah menjauhi sifat nifaq, banyak-banyak mengingat Allah, tidak menunjukkan minat yang berlebihan kepada dunia, sebaliknya mereka hendaklah dengan sukarela dan senang hati berbelanja di jalan Allah.

Beberapa Kata Kunci Dan Tema Utama Surah

1. (Ayat: 7).

هُمُ الَّذِينَ يَقُولُونَ لَا تُنْفِقُوا عَلَىٰ مَنْ عِندَ رَسُولِ اللَّهِ حَتَّىٰ يَنْفَضُوا وَلِلَّهِ خَزَائِنُ السَّمَوَاتِ وَالأَرْضِ وَلَكِنَّ الْمُنَافِقِينَ لَا يَفْقَهُونَ ﴿٧﴾

7. Merekalah yang mengatakan (kepada orang-orang Islam di Madinah yang menolong Rasulullah dan orang-orang Muhajirin): "Janganlah kamu membelanjakan harta kamu kepada orang-orang yang ada bersama-sama Rasulullah supaya mereka meninggalkannya". Padahal bagi Allah jualah perbendaharaan langit dan bumi, (tiada sesiapaupun yang dapat memberi atau menyekat sebarang pemberian melainkan dengan kehendakNya); akan tetapi orang-orang yang munafik itu tidak memahami (hakikat yang

sebenarnya).

Firman Allah ini menggambarkan kata-kata dan perancangan ketua orang-orang munafiq kepada anak buahnya supaya tidak berbelanja dan memberi sumbangan kepada orang-orang Muhajirin yang miskin supaya kesatuan dan perpaduan orang-orang Muhajirin dan Anshar menjadi berantakan dan jama'ah Islam pula menjadi pecah.

2. (Ayat: 10).

وَأَنْفِقُوا مِنْ مَا رَزَقْنَاكُمْ مِنْ قَبْلِ أَنْ يَأْتِي أَحَدَكُمْ الْمَوْتُ فَيَقُولَ رَبِّ لَوْلَا أَخَّرْتَنِي إِلَى أَجَلٍ قَرِيبٍ فَأَصَّدَّقَ وَأَكُن مِنَ الصَّالِحِينَ ﴿١٠﴾

10. Dan belanjakanlah (dermakanlah) sebahagian dari rezeki yang Kami berikan kepada kamu sebelum seseorang dari kamu sampai ajal (maut) kepadanya, (kalau tidak) maka ia (pada saat itu) akan merayu dengan katanya: "Wahai Tuhanku! Alangkah baiknya kalau Engkau lambatkan kedatangan ajal matiku - ke suatu masa yang sedikit sahaja lagi, supaya aku dapat bersedekah dan dapat pula aku menjadi dari orang-orang yang soleh ".

Firman Allah ini merupakan jawapan kepada ayat ke-7 yang dikemukakan sebelum ini. Di dalam ayat ini Allah memerintahkan orang-orang Islam supaya tidak terpengaruh dengan di'ayah orang-orang munafiq. Orang-orang Islam sebaliknya hendaklah berbelanja di jalan Allah sebelum mereka mati.